

Si qua dies niveis unquam signanda lapillis
nobis, et plausu si qua terenda fuit;
Illa dies certe est, qua Tu, productus in auras,
coepisti patrios exhilarare lares.
Plaudimus hinc, redit, en tempus, vitae micuere
quo cum sole simul lumina prima Tuae!
Non Tibi sollicitum Natalem reddit hic annus,
Mars repetit quamvis ferrea bella ferox:
Nam Tibi nascenti, nostri Tutela Lycei!
fatales nerunt fortia fila Deae.
Ergo agedum! *Socii*, mecum superate Heliconis
culmina, queis juvenes nectere sarta solent;
huncce diem nam fas est carminibus celebrare,
(ferreus est, quisquis carmina nulla canit.)
Favet io! votis deus, et nova gaudia surgunt
nobis, o *Socii*, vota canora date!
In Te hilares animos, Doctor, nunc vertimus ecce!
pro Te nunc ferimus vota precesque deo.
Divitias etenim nobis gaudes aperire,
quas gremio condit Graecia docta suo;
Gaudes in Romana ac nos inducere prata,
quae de Castalibus fontibus usque madent.
Auges hinc nostros animos lingua geminata
et studiis crescent nomina nostra Tuis.
Quae rara ingenii facundia, quisve diserto
Tullius ore Tibi dicere cuncta queat?